

陶文毅公全集

陶文毅公全集卷二十八目錄

奏疏

水利

籌款疏淪沿淮各湖摺子

興修皖省水利隄防附片

陳奏勸修水利附片

請拆除吳淞江口石閘附片

會同江督奏勘估吳淞江工程摺子

會同江督驗收吳淞江工程摺子

會同江督奏吳淞江岸請建前任勤事知府專祠

列入春秋祀典摺子

會同江督借款挑濬瀏河摺子

籌款興挑孟瀆等河摺子

孟瀆等河工竣驗收摺子

挑濬孟瀆河工竣摺子

請將糶米價銀留爲湊挑瀏河之用附片

請樽節估挑瀏河白茆河以工代賑摺子

查勘瀏河白茆挑工履視海塘及丹陽練湖形勢

附片

陳奏開濬瀏河並建設石壩涵洞全竣摺子

奏疏 水利

籌款疏淪沿淮各湖摺子

奏爲履勘淮河並設法籌辦情形仰祈

聖鑒事竊臣前月入覲

天顏仰蒙

垂詢淮河淺阻情形並

諭回皖時順道查勘等因臣於

陛辭後馳抵鳳陽府境遇廬鳳道戴聰詢悉前此洪湖

直瀉淮流逐段淺阻窒礙漕行業於正月內率同

鳳陽府程懷璟及各州縣設法疏濬並經大學士

臣孫玉庭札飭疏淪沿淮各湖茲臣帶同該道親往勘得淮河正身現已流通船行無滯惟洪澤一湖必藉淮源旺盛方資收蓄敵黃自應多方導引以助其勢徧歷濱淮各處有鳳陽縣境之花源湖壽州境之城西湖鳳臺縣境之蕉岡湖均可抽溝引導入淮此三湖皆周圍數十里本係民田久淹成浸其城西湖蕉岡湖兩處抽溝約需經費數千兩現經該州縣勸民辦理毋庸另籌經費惟鳳陽縣境之花源湖該境民多窮乏勢難捐辦查得道庫有舊存水利平餘銀兩係不報撥之閒款堪以

動用擬提用銀二千兩交鳳陽縣剋期興辦又懷遠縣荊山口之南因嘉慶年間黃河南潰新漲沙洲名曰葫蘆繫東西橫長十餘里阻遏茨河淮水自西南而北繞越此洲倍形迂曲以致水勢倒漾爲上游各州縣之患前經抽溝一道必須再開引河數道將葫蘆繫繫斷俾大河口門通暢而淮水亦得建瓴直下所需工費查司庫有積存宿靈抽溝利息銀兩擬提用銀一千二百兩交懷遠縣趕緊疏挑以上花源湖葫蘆繫兩處動用工費無多均非正項錢糧應俟事竣由道驗收無庸造冊報

銷以歸簡捷所有查勘淮河情形並酌籌辦理緣  
由理合恭摺覆

奏伏乞

皇上聖鑒訓示施行謹

奏

道光五年四月初二日奉到

硃批所辦甚好務要認真查驗另有旨諭欽此同日奉  
到

上諭陶澍奏籌辦淮河情形一摺洪澤湖藉淮敵黃自  
應多方導引以資收蓄經該撫勘明各處情形除壽

州境城西湖鳳臺縣境蕉岡湖兩處抽溝係該民人  
自辦無庸另籌經費外惟鳳陽縣境花源湖民多窮  
乏勢難捐辦著准其將道庫舊存水利平餘閒款內  
提銀二千兩交鳳陽縣剋期興辦又懷遠縣荆山口  
南新漲沙洲葫蘆繫須再開引河數道著准其在司  
庫積存宿靈抽溝利息內提銀一千二百兩交懷遠  
縣趕緊疏挑該兩處動用工費均非正項錢糧工竣  
由道驗收無庸造冊報銷該撫務須認真查驗如有  
草率偷減卽行參辦毋稍徇隱該部知道欽此



興修皖省水利隄防附片

再臣查淮水爲洪澤湖之源出自豫省桐柏縣流經固始入安徽阜陽境至霍邱縣之溜子口而南納淠水至潁上縣之八里塚而北納潁水地勢建瓴尙無阻滯迨壽州之正陽關以逮懷遠至鳳陽之蚌埠一帶河流曲折時東時北以次納東淝西淝裔溝黑濠洛澗及汭河茨河天河渦河北淝河大小數十水兼之西有鳳臺之峽石山東有懷遠之荆塗山重重鈐柙淮流其間水勢本屬紆回自嘉慶年間黃河南潰夾帶泥沙淮流淤墊成高以

致左右收納各水不能暢入節節壅滯迴漾成湖  
不一而足臣此次履勘親登塗山絕頂復登壽州  
城北之八公山數百里長河支汊瞭然在目此時  
春水方生勢已瀾漫一交伏汛每汪洋一片橫溢  
民田歲歲偏災耗費

帑項自應設法補救以奠災區惟查洪澤一湖近年  
因啟放黃流其西岸已多淤灘若將淮水疏刷不  
特水深泥滑之處難以興工兼恐泥沙直下更益  
洪湖之患祇有築隄束水俾清流暢入湖心既可  
蓄以敵黃而於兩岸民田即可藉隄保衛但經費

浩大無從籌措必須地方官實心實力爲民信服者隨時督勸百姓設法辦理日計不足月計有餘自可漸著成效查現在各州縣中已有數處勸民修利隄防開通溝洫俟辦竣核實奏請

恩獎以資鼓勵此外如壽州之芍陂懷遠之郭陂塘等處皆水利最鉅之區日久蕪廢容臣督率各屬次第整理以興民利合併附陳伏乞

訓示謹

奏

道光五年四月初二日奉到

硃批興水利除水患莫大之善政也總要督率認真勸導有方固不可徒費周章亦不可始勤終怠詳慎勉之欽此

陳奏勸修水利附片

再臣前奏勘辦淮河情形一摺接奉

硃批興水利除水患莫大之善政也總要督率認真勸導有方固不可徒費周章亦不可始勤終怠詳慎勉之欽此捧誦之下仰見我

皇上勤求民莫

訓示周詳之至意曷勝感悚欽佩伏查皖省南介大江北近黃河西引長淮東瀦洪澤低窪之區最易受淹臣前因查辦水災節飭各州縣設法修利隄防藉資捍衛其時沿江各圩垸不下數百所咸卽勸

民興築宣城南陵繁昌等縣被沖尤多如金寶圩周圍至一百七十餘里如養賢圩葉村灣管嘴灘等處缺口各長五六百丈高至二三丈不等經

臣

督飭該府郭承恩高澤履該縣朱錦琮劉邦鼎張星煥等勸諭捐修均已次第竣工其銅陵縣之邊江老壩綿長六十餘里共需土方一萬七千有餘亦經督飭該縣孫榮勸令紳士等計畝攤修現在又據望江縣尹作翰稟報該縣之妙光圖等圩周圍三十餘里內有田三萬七千餘畝一經夏漲卽虞淹沒該縣接到通飭卽勸令紳民計畝出夫通

力合作以種田之多寡定築隄之丈尺間有田多而人力未逮卽於田少人多之戶捐賞銀錢令其幫同挑築俾田多者不致偷安取巧田少者亦無舍已芸人之病興工兩月一例報竣統計隄長三千三百餘丈高廣各二丈五尺驗收之後經臣飭司記功並飭將紳士等給匾獎勵其鳳陽花源湖現已興挑復查得花源湖之北有牢家湖一處亦可引水入淮自黃水停淤每逢盛漲水無宣洩田多漫淹飭據署鳳陽縣候補通判洪大鏞稟勘湖長二十餘里西有舊溝一道直抵淮河長五百八

十餘丈應行挑濬有該境耆民陳姓刁姓牟姓等  
僉請照業食佃力之法捐貲集夫挑辦如捐款不  
敷該通判自願捐廉資助臣已批飭如稟辦理其  
餘各處容臣逐漸督率興修斷不敢徒爲周章亦  
不敢稍有怠弛以副

宸廑所有現在勸修水利各情形合併附片以  
聞謹

奏

道光五年五月十三日奉到

硃批知道了欽此



請拆除吳淞江口石閘附片

竊臣查江浙水利莫大於太湖其分洩入海之路

有三一曰吳淞江卽太湖正流也一曰黃浦卽東江也一曰瀏河卽婁江也吳淞最大自分流南入黃浦而吳淞日微瀏河亦逐漸增淤矣每遇霖潦水無所歸潑而成災議者但咎水利不修由於上流不疾下流遂淤之所致欲舉全省之湖塘浦汊而挑之濬之撈之無論工費浩大亦無如許人力就使挑挖全通建瓴直下而水無瀦蓄一瀉無餘豈民田之利哉夫太湖號稱三百餘里其實祇係

數澤寬而不深所收江浙及宣歙諸水發源不遠  
不過三五百里而止東及海濱亦止二三百里源  
短而流亦短非如洞庭彭蠡有千數百里之來源  
也而所灌蘇松常太杭嘉湖數府州之田畝以億  
萬計漕糧居天下之大半皆恃太湖爲之潤漑此  
不徒憂澇而並宜防旱也其間縱浦橫塘十灣九  
曲皆天然之溝洫所以資蓄洩而猶不免於偏災  
偶見者其來有漸殆非一朝夕之故究其弊端多  
由民田侵占爭及尺寸而江流日隘兼自明代以  
來言水利者往往不顧全局遇有壅滯不治其本

而別開津汊以苟一時之利以致支流愈分正流日塞然此二者之爲害猶顯而易見惟吳淞江口建閘一事則不但不究其害而羣且議以爲利謂潮來下版可以遏沙潮退啟版清水仍可暢出其說似是而實非夫吳淞爲禹貢三江之一與岷江浙江並列乃天地所以吞吐陰陽之氣非如無源之港汊可以扼其吭而爲之節也海潮既能挾沙而來卽能挾沙而去如岷江浙江其委未嘗置閘而沙固未嘗淤也況江身亦自有淤泥尙欲藉潮退之勢推卸以入海一經置閘內外隔絕潮水之

挾沙而上者無江水爲之回送而沙停於閘外矣  
江水之挾泥而下者無潮水爲之掣卸而泥停於  
閘內矣臣此次遵

旨覆勘工程由青浦華亭至上海親見黃浦無閘而海  
潮鼓盪江面闊深吳淞江有老閘又有金家灣新  
閘而沙泥停積數十里水小如溝船隻往來反俟  
潮水爲之浮送詢問土人僉稱老閘建自康熙年  
間甫成卽圯新閘成於乾隆二年亦止虛設難於  
下版緣閘距吳淞黃浦合流之處僅六七里全潮  
灌入非閘所能禦該處沙土鬆浮一經下版閘身

震動是以徒有歲給閘夫銀兩毫無實濟轉足以  
阻礙船行停滯泥沙幸上年估工未修並未糜費  
臣思吳淞江爲江浙水利第一樞紐其上源不宜  
直瀉所以蓄水勢而口門則斷不可梗塞以致停  
淤也石閘有害無利應行拆除其閘前閘後所積  
沙泥並沿江灣曲淺灘均應設法疏挑俾資通順  
以利全省似未可以經費未充遂爲停歇臣與  
督臣再細商推飭司妥議一俟籌有成局另行確  
估興工至三吳農田絕少隄圩每虞潦澇惟有照  
業食佃力之法於隆冬閒暇時按畝出夫一二名

挑淺浚深卽因出土以爲圩圍每歲通力合作以  
三日爲率約計出土可高一二尺越三四歲而圩  
圍可成矣但須良有司久任而民信從者始能爲  
之此則微臣目前所未逮而有志焉者也所有勘  
視水道並擬續辦吳淞水利緣由謹附片具陳伏  
乞

聖鑒訓示謹

奏

道光五年八月二十九日奉到

硃批另有旨欽此同日奉到道光五年八月十三日奉

上諭陶澍奏吳淞江口所建石閘有害無利老閘甫成  
卽圯新閘亦止虛設難於下版徒有歲給閘夫銀兩  
毫無實濟應行拆除等語吳淞江爲江浙水利關鍵  
原建閘座本爲禦潮而設若果如該撫所勘情形不  
但不能禦潮轉足以阻礙船行停滯沙泥自應拆除  
以利水道惟當時屢次建閘自非無因且現有議以  
爲利者亦未可遽行拆去著該撫與琦善再行詳勘  
情形細心商榷如果必應拆除另行飭司妥議確估  
辦理此閘經歷有年且現在南河興舉要工卽從緩  
辦亦無不可也將此諭知陶澍並諭琦善知之欽此

會同江督奏勘估吳淞江工程摺子

奏爲勘估吳淞江挑工銀數及現在督飭興辦情形

仰祈

聖鑒事竊照吳淞江關係蘇省水利前經臣陶澍於道

光五年覆勘挑工摺內聲請飭司妥議俟籌有定

局另行確估興工臣蔣攸銛到任後復經會議籌

挑本年七月十五日具

奏旋於八月初五日承准軍機大臣字寄奉

上諭御史李鵬奏請疏浚東南水利一摺據稱瀏河口

淤成平陸吳淞下游僅如溝洫等語江蘇省三江永



利前會議准興修嗣因需費較多僅將黃浦一路挑浚吳淞各工暫行停辦自應及時疏挑著卽派委妥幹大員逐加查勘應如何將正河籌款修治其支渠汊港有關水利之處可否照業食佃力之例勸諭紳耆董辦詳細體察情形通盤籌畫定議具奏等因又於八月二十日前摺回蘇接奉

諭旨蔣攸銛等奏籌備挑濬吳淞江銀款及時興辦一摺昨據御史李鵬奏請及早疏濬當經降旨令該督等籌議勘辦茲蔣攸銛等於未經接奉諭旨之先已議籌款挑濬著照所請准其將明年辦理海運案內

節省贈五等米糶變價銀留爲挑濬經費先於本年  
平糶緩漕米價銀內借動銀二十餘萬兩及早給發  
領辦卽遴派道府大員詳勘確估如法疏治等因欽  
此均卽轉行司道勘辦去後茲據蘇州布政使梁  
章鉅署江蘇按察使潘恭常署蘇松太道陳鑾會  
詳遴委蘇州府總捕同知范博文等會同蘇州松  
江太倉三府州督同上海青浦嘉定三縣將吳淞  
水道逐細勘估查得道光四年原勘係照南河挑  
工土方閒月則例酌估計需土方夫工築壩等項  
共銀三十萬五千一百餘兩迄今數年河道更形

淤塞現估自井亭渡起至曹家渡止計四十三段  
工長一萬八百八十九丈八尺挑土一百一十四  
萬三千七百八十三方一分七釐分別深淤淺淤  
兩則估銀二十九萬三千零二兩八分一釐四毫  
又築工頭工尾柴土壩座共銀六千一百八十五  
兩三錢四分通共挑河築壩估銀二十九萬九千  
一百八十七兩四錢二分一釐四毫內有上海縣  
境逢灣取直之處是以現估銀數較四年原估更  
爲減省經藩司梁章鉅親詣覆勘實係撙節確估  
並無浮濫惟工段綿長若僅由坐落之上海青浦

嘉定三縣領辦誠恐照料難周致有草率議請分作十二分添派得沾水利之元和吳江震澤崑山新陽太倉鎮洋寶山等八州縣各承挑一分上海縣境工段較長承挑二分青浦嘉定二縣各承挑一分並於南河稟請選派熟諳工程之幹練備弁河兵幫同照料於九月二十二日上下次第煞壩至十月十一日曹家渡攔潮大壩合龍旋即戽水興挑所有工費除動用平糶米價銀款工竣核實造報外尙有不敷仍照原

奏由外籌款湊足應用其外籌之款卽請無庸報銷

以歸簡易至瀏河海口久經淤塞自應欽遵

諭旨及時疏濬惟因籌款不易勢難與吳淞大工同時並舉查道光四年議修水利如白茆河四江口及此外由湖出江由江出海各處會請分年辦理現俱淤墊日甚容再隨時確勘與瀏河海口次第籌辦其各處支渠汊港應由各州縣設法勸修以利農田詳請具

奏前來

臣

陶澍現在由省親詣履勘覆核無異面飭

督催工員循照章程堅築壩工先開樣河各立認杆預抽子溝並於舉工之始先定椿繩起土之時

遠堆隄堰一切督察稽查賞罰犒勞務俾實力奉行如呆承辦各員勤奮出力俟工竣量請

恩施獎敘倘稍有草率玩延定卽參處以期工歸實用  
仰副

聖主爲民興利之意仍俟工竣後遵

旨親詣驗收另行

奏報至動用工費除平糶緩漕米價尙有不敷其由外籌湊之款邀免報銷又展挑灘漲之處空廢蕩田在所不免此等蕩田多係侵占官河而成歷年已久如有業已陞科者應予豁糧不准再給地價

道光四年曾經

奏明應卽照辦合併陳明所有籌議吳淞水利及興

辦工程緣由

臣

等謹合詞恭摺具

奏伏乞

皇上聖鑒謹

奏

道光七年十一月二十四日奉到

硃批另有旨欽此同日奉到道光七年十一月初八日

內閣奉

上諭蔣攸銑等奏勘估吳淞江挑工銀數並督飭興辦

一摺吳淞江自井亭渡起至曹家渡止工段較長經  
該督等委員勘估分別深淤淺淤估銀二十九萬三  
千二兩零又築工頭工尾柴土壩座銀六千一百八  
十五兩零通共挑河築壩估銀二十九萬九千一百  
八十七兩零若由上海等三縣領辦恐其照料難周  
不免草率著照所請除上海縣工長承挑二分青浦  
嘉定二縣各承挑一分外其餘著添派得占水利之  
元和吳江震澤崑山新陽太倉鎮洋寶山等八州縣  
各承挑一分所有承辦各員如果勤奮出力著於工  
竣時量予獎勵倘草率玩延卽著嚴參總期工歸實



用帑不虛糜工竣著該撫親往核實驗收其動用工費除平糶米價銀款造報外其外籌之款卽著無庸報銷至乞廢蕩田本係侵占官河其業已陞科者准其豁糧不准再給地價該部知道欽此

會同江督驗收吳淞江工程摺子

奏爲挑濬吳淞江工程驗明如式完竣仰祈

聖鑒事竊照吳淞江年久淤塞關繫蘇省水利前經  
臣等會議興挑奏奉

諭旨遵行當卽飭委司道督同各府州勘估實需銀數  
及督飭興辦情形復經恭摺具

奏欽奉

諭旨吳淞江自井亭渡起至曹家渡止工段較長經該  
督等委員勘估通共挑河築壩估銀二十九萬九千  
一百八十七兩零若由上海等三縣領辦恐其照料

難周不免草率著照所請除上海工長承挑二分青浦嘉定二縣承挑一分外其餘著添派得沾水利之元和吳江震澤崑山新陽太倉鎮洋寶山等八州縣各承挑一分所有承辦各員如果勤奮出力者於工竣時量予獎勵倘草率玩延卽著嚴參總期工歸實用帑不虛糜著該撫親往核實驗收其動用工費除平糶米價銀款造報外其外籌之款卽著無庸報銷等因欽此當復轉行各司道欽遵嚴催各工員趕緊如式挑竣去後茲據江蘇布政使梁章鉅署江蘇按察使潘恭常護理蘇松太道陳鑾會詳承辦

各州縣於上年十月十一日攔潮大壩合龍之後  
雇集人夫戽水與挑祇因開工以後時值嚴冬連  
遭雨雪挑挖河道積水較多雖經隨時車戽而涸  
復之後又逢雨雪且時屆沍寒上下河隄冰凌凍  
結夫役不能立足人力難施其震澤崑山新陽太  
倉鎮洋五州縣承挑工段坐落野鷄墩一帶古淺  
處所積淤深厚幾成平陸應挑土方倍於他處是  
以歲內未能一律完竣迨至今年正月天時晴霽  
飭催印委各員添雇人夫設法趕挑所有起出之  
土俱令遠堆原定界外築成隄堰以防傾卸復隨

時督催各工員認真挑挖務使一律深通以收實效現據署蘇州府知府李景嶧署松江府知府王有慶蘇州總捕同知范博文蘇州督糧同知王青蓮轉據各工員陸續具報工竣並據新陽縣稟稱所挑工段內起出遠年沈溺糧船一隻板片朽爛艙內尚有磁碗煤炭等物又據上海縣稟稱所挑工段內起出遠年沈溺海船一隻板片朽爛查有洋木秤桿鐵錘等物俱係海船應用之物深入沈淤現經起出候驗等因前來並據藩司梁章鉅詣驗如式

臣蔣攸銛現赴清江勘工不克會詣吳淞

臣陶澍卽遵

旨親往驗收於二月初七日在蘇啟行由白茆等處一路查勘順抵吳淞江親赴各工按照估冊逐段勘量自青浦縣頭壩起至上海縣攔潮大壩止通工計長一萬八百八十九丈有零細加覆勘悉與原估寬深丈尺有贏無絀內有太倉新陽上海嘉定吳江鎮洋青浦寶山等州縣均於原估丈尺之外加工挑挖其寬深多至二三尺及六七尺不等均係捐貲辦理並無偷減草率情弊臣復以攔潮大壩爲新開河道尾閘若壩基未能啟除淨盡卽於

全河大有阻礙遂親至工所督飭該道府及各員  
弁竭五晝夜之力趕緊將攔潮大壩柴草堅埽及  
下戴積土逐層攷除淨盡定限於十七日丑刻先  
將青浦上游頭壩開放使清水流注充滿午刻將  
上海下游大壩開放目擊水勢暢出洶湧如雷壩  
外淤泥立時衝散未刻海潮大至水勢擡高內外  
刮刷臣卽乘潮回省沿途按段測量水深均有一  
丈九尺至二丈不等實爲一律深通毫無淺滯之  
處訪詢沿途耆庶咸稱百餘年來未有如此開空  
深通之工臣逐段驗收歡聲載道卽如各縣所挑

工段內起出沈溺糧船海船等多年陳物湮埋江  
底爲從前開浚所未及者茲皆挑挖起出其爲深  
通勝於往時已有明證從此舟楫暢行旱潦無慮  
民生永資利賴

國賦愈樂輸將堪以仰副

皇上軫念農田水利覆育蒼生之至意所有通工挑河  
築壩共銀二十九萬九千一百八十七兩零原議  
籌動海運案內節省贈五等米價銀

奏准於平糶緩漕米價先行借動當將緩漕米價二  
十六萬五千七百三十二兩零給發支用在案今



海運停止贈五等米無從節省歸款仰懇

皇上天恩俯准將原借平糶緩漕米價銀二十六萬五千七百三十二兩零卽作爲挑浚吳淞經費就款開銷感沐

聖恩益無旣極仍飭令照數造報此外不敷銀三萬三千餘兩以及興工後因遇雨雪車戽一切費用增多並各州縣於原估之外加挑寬深所需工費皆在外自行捐措仍欽遵

諭旨免其報銷至此次工程經藩司梁章鉅屢次親詣督率籌辦署臬司蘇松太道潘恭常協同商酌均

極精詳妥協但係司道大員不敢仰邀議敘其承辦各員<sub>臣</sub>等查明實在勤奮出力者開列清單遵旨保

奏仰懇

皇上恩施量加獎勵其餘出力各員弁人數衆多分別咨部議敘由外記功核實辦理再查委員內武進縣縣丞陸鈞於辦工喫緊時藉病遷延候補府經歷陳溶雇夫遲玩現在工程雖無貽誤仍應請

旨交部議處以儆將來所有挑濬吳淞江全工完竣驗收緣由謹合詞恭摺具

奏伏乞

皇上聖鑒訓示謹

奏

道光八年四月初七日奉到

硃批另有旨欽此同日奉到道光八年三月二十一日

內閣奉

上諭蔣攸銛等奏挑濬吳淞江工程完竣一摺江蘇吳淞江年久淤墊前經飭令興挑茲該督等查明通工挑河築壩一律完竣並無偷減草率情弊著照所請准將原借平糶緩漕米價銀二十六萬五千七百三

十二兩零卽作爲挑浚吳淞江經費就款開銷仍飭令照數造報其不敷銀三萬三千餘兩及興工後一切增多費用並各州縣自行捐措之款著仍遵前旨免其報銷藩司梁章鉅署臬司蘇松太道潘恭常籌辦商酌均極精詳俱著加恩交部議敘護理蘇松太道加道銜蘇州府知府陳鑾署蘇州府松江府知府李景嶧蘇州府督糧同知王青蓮署太倉州邳州知州李正鼎俱著以應陞之缺陞用上海縣知縣捐陞知府李廷錫著俟赴部投供時以本班儘先選用前任金匱縣知縣捐陞知府齊彥槐蘇州府總捕同知

范博文嘉定縣知縣捐陞知府淡春臺吳江縣知縣  
時功旃新陽縣知縣德宜青浦縣知縣蔡維新寶山  
縣知縣陳玉成署崑山縣知縣盧本淳署鎮洋縣知  
縣景壽春松江府經歷張慶瑗江陰縣縣丞畢以紱  
嘉定縣縣丞姚大成長洲縣主簿李述三俱著交部  
從優議敘南漕縣縣丞鄭祖經前於海運案內以應  
陞之缺陞用著遇有相當缺出不論繁簡卽行陞用  
蘇州府照磨謝元淮運河營守備盧永盛俱著以應  
陞之缺儘先陞用揚州府檢校胡澤光青浦縣新涇  
司巡檢陞署元和縣主簿方景雯海州惠澤司巡檢

魏邦魯昭文縣白茆司巡檢林觀光俱著以應陞之  
缺陞用試用府經歷錢家驥試用主簿李琮曹錫璜  
試用未入流程勦著各照本班儘先補用其餘在工  
出力各員弁著查明分別咨部議敘由外記功核實  
辦理武進縣縣丞陸鈞於辦工時薪病遷延候補府  
經歷陳溶雇夫遲玩俱著交部議處該部知道單併  
發欽此

會同江督奏吳淞江岸請建前任勤事知府專祠  
列入春秋祀典摺子

奏爲吳淞江岸請建前任勤事知府周中鉉專祠仰  
祈

聖鑒事據蘇州藩司梁章鉅護理蘇松太道陳燮會詳  
稱道光七年議濬吳淞江欽奉

諭旨允行於九月下旬興工先在上海縣曹家渡地方  
建築攔潮大壩爲通工鈴束該處逼近海口潮汐  
奔騰兩岸皆沙土鬆浮適值連日東風大作潮勢  
洶湧異常遂致旋築旋墊該司道親往督辦目擊

風猛雨淋挾潮而進壩底刷深至三丈餘尺勢甚  
危急人力難施詢之土人僉稱江岸有周太僕祠  
夙著靈應該司道親詣虔禱並於壩頭設祭沈以  
牲醴頃刻之間驟轉西風大潮頓落卽夕堵築合  
龍本年二月通工挑竣臣陶澍親往啟壩赴祠禱  
祝西風復作海潮消退清水建瓴而下內外刮刷  
全河一律深通自始至終險工獲佑查周太僕名  
中鎡浙江山陰縣人雍正年間任松江府事時方  
挑濬吳淞

特命副都御史陳世倌會同總督范時繹巡撫陳時夏督



辦中鉉承築大壩因潮水洶悍屢築屢潰不能合  
龍中鉉親率河標把總陸章乘船衝流督夫下壩  
風急水溜陸章請移舟登岸中鉉不可遂與陸章  
俱沒於水而隄亦旋合時雍正六年三月二十九  
日也事

聞奉

上諭周中鉉平日居官甚優今被溺殞命更可惋惜又於  
巡撫陳時夏摺內欽奉

硃批周中鉉等可謂因公盡命深可惋惜覽至此朕幾乎  
淚落等因旋奉

旨議卹贈太僕寺卿

予祭葬乾隆二十六年經巡撫陳宏謀題祀名宦事載

世宗憲皇帝硃批諭旨及雍正六年

上諭並松江府志等書該處士民追思舊澤私建小祠於

吳淞江畔歲時報享祈禱皆應今挑濬吳淞復著

靈異僉請建立專祠春秋致祭

臣

等伏思東南財

賦莫重於蘇松而年穀順成必資乎水利吳淞江

爲衆流入海之要津實東南水利之關鍵茲蒙

皇上軫念民生

特允動款興挑從此水澤常通永資利賴惟瀕海施工

極爲艱險乃當堵築大壩於勢甚危急之際化險  
爲平工竣啟壩復俾潮迴清注暢刷深通是周中  
鉉爲

國且勞精誠不泯生前旣因築壩死事沒後復以捍  
潮効靈功在吳淞洵爲昭著記載以死勤事則祀  
之能捍大患則祀之周中鉉雖經從祀名宦未有  
專祠合無仰懇

聖恩准於吳淞江岸建立專祠列入春秋祀典俾輿情  
獲遂水利長沾再查吳淞江岸舊有小祠現經護  
理蘇松太道陳鑾就近估修卽於舊址擴充修葺

無庸另行擇建所需工費由藩司及該護道等捐辦其春秋祭銀循照成案於學租款內支給歸地方官辦理合併陳明伏乞

皇上聖鑒

敕部議覆施行謹

奏

道光八年四月初七日奉到

硃批另有旨欽此又同日奉到道光八年三月二十一

日內閣奉

上諭蔣攸銓等奏吳淞江岸請建前任知府專祠一摺

江蘇吳淞江岸舊有前任松江府知府周中鉉祠宇  
該處士民歲時祈禱皆應茲該督等奏挑濬吳淞江  
時復以捍潮効靈功在該處洵爲昭著周中鉉著准  
其於吳淞江岸建立專祠列入春秋祀典該部知道  
欽此

會同江督借款挑濬瀏河摺子

奏爲籌議估濬瀏河借糶緩漕米石攤徵還款仰祈  
聖鑒事竊照瀏河卽古之婁江其上游自太湖東北迤  
邐而來至新陽縣界之新造橋與吳淞分流而東  
遶太倉州城南歷鎮洋嘉定等界東入於海綿長  
七八十里自嘉慶十七年挑浚之後屢經水患沙  
泥淤墊旱澇無從灌洩不但太倉州屬農田失收  
兼爲上游蘇松一帶水道之梗近來淤墊更甚以  
致歲收屢歉臣陶澍前因公經過該處目擊情形  
幾同平陸其出海之處有攔門沙一道阻遏海口

欽定大清會典事例 卷一百一十五  
三  
當諭護理海關道陳鑾署太倉州李正鼎逐細履勘或另籌入海之道並於驗收吳淞工程案內會同臣蔣攸銛附片

奏明瀏河等處工程應分年辦理在案查本年吳淞江欽奉

諭旨疏挑夏秋間雨水雖多宣通迅速業已著有成效若瀏河不加疏浚設遇旱澇爲災附近民田或淹或涸誠恐復議賑蠲於

國計民生均無裨益且浙省湖州所屬各縣濱湖諸澮港業經該省奏辦興挑該處卽吳淞瀏河之上

游將來挑通之後來源既旺必須尾間通暢方能  
一氣貫輸茲據太倉州轉據地方紳士呈請借

帑興辦當卽飭委蘇藩司梁章鉅上海道潘恭常先  
後往勘均稱該處淤塞已甚爲目前亟應興辦之  
工查瀏河關繫各屬農田水利未便聽其湮塞惟  
口門既有攔沙必致旋挑旋淤自應相度地形另  
改歸海去路俾水勢暢行一勞永逸此次工程旣  
鉅經費孔多應須動用銀款必得先爲籌備伏思  
地方要工原應民捐民辦惟蘇省自道光三年重  
災以後元氣未復民力拮据且工段綿長通盤籌



計總須數十萬兩此時卽責成閭閻斷難先事鳩集而藩庫又無現款可籌據蘇藩司梁章鉅詳稱查得蘇松等屬道光八年有應行帶徵歷年緩漕正耗及七年冬間徵剩未完米款約計二十餘萬石應於歲內隨正漕帶徵派幫搭運今思本省水利要工難以再緩合無仰懇

皇上恩施准將此項米石留蘇糶變卽借作挑浚瀏河之費仍俟工竣後按年分限攤徵還款一轉移間於

國帑並無所虧而水利民生皆有實濟如蒙

俞允

臣

等再飭該司道等先將應辦工段方價確加勘

估

臣

陶澍並當親行履勘核實飭開工程銀數清

單縷晰入

奏一面飭蘇糧道確查徵完米數由蘇藩司查明各

屬時價酌中核定詳明飭糶提貯司庫以備工需

如有餘存仍行報撥倘或不敷另行籌款湊辦所

有瀏河亟應挑浚及籌議借糶緩漕攤徵歸款緣

由謹合詞恭摺具

奏伏乞

皇上聖鑒訓示謹

奏

道光九年正月十三日奉到

硃批另有旨欽此同日奉到道光八年十二月二十七

日內閣奉

上諭蔣攸銛等奏籌議估濬瀏河借糶緩漕米石攤徵  
一摺著戶部核議具奏欽此

籌款興挑孟瀆等河摺子

奏爲勘估武進縣境水利工程借動籌備銀款乘時興挑以資利賴仰祈

聖鑒事竊照蘇省瀏河孟瀆等河日久淤墊亟應興挑經臣陶澍於道光八年吳淞江收工摺內附片陳明本年正月因緩漕米石除搭運外剩米十數萬石運河枯淺難以全行帶運請留蘇糶變暫借爲挑浚瀏河孟瀆河之用攤徵歸款

奏蒙

俞旨嗣於覆奏緩漕分別搭運糶變數目摺內聲明孟

三  
瀆河及相近之得勝河澡港河多有淤塞應須一併辦理或與瀏河同時並舉或先後興挑熟籌核議另行奏辦於本年閏四月間

奏蒙

聖鑒在案查常州府屬武進縣境運河之北有孟瀆得勝澡港三河皆南通運河北達大江旱則引江湖以濟運灌田並可直達無錫金匱宜興荆溪各縣以資接濟如遇水潦卽宜導入江不致壅溢爲患實爲各屬水利要道惟孟瀆河自嘉慶二十年興挑得勝河自嘉慶十一年興挑後均已湮塞不通

澡港河自乾隆三十年挑辦至今已越六十餘年  
亦久經淤墊經臣陶澍暨臣梁章鉅先後親往勘  
明數十里之遙並無江潮灌輸水泉滋潤現在農  
田受困民望孔殷實爲刻不可緩之工較之瀏河  
尤應先行興辦茲據署蘇州布政使衍慶常鎮道  
劉名載會詳據調署常州府知府趙光祿武進縣  
知縣程士偉陽湖縣知縣廖鴻苞會勘得孟瀆一  
河估需土方夫工例價津貼連壩座工料共銀一  
十三萬四千五百七十兩零又因孟河舊口漲有  
老沙難於開挖改開超瓢港出口通江應行挖廢

沙田拆移草房遷讓墳地共需銀二千九百六十  
三兩零並於孟河中間添建閘座需銀一萬八千  
八百六十二兩零又得勝河估需例價及津貼等  
銀三萬六千九百三十九兩零澡港河估需例價  
及津貼等銀一萬三千三百八十三兩零以上三  
河共需工費銀二十萬六千七百餘兩選舉董事  
余保純等分段領銀挑辦官爲稽察所需工費銀  
兩議請分作十成照康熙十九年鄰縣協濟成案  
歸於武進陽湖無錫金匱宜興荆溪六縣攤徵內  
武進陽湖二縣共攤五成無錫金匱宜興荆溪四

縣分攤五成各分限十年按照條銀徵還歸款並  
據各該縣以輿情允洽出具印結詳送司道覆加  
查勘委無浮冒查糶變緩漕米價已據各屬全數  
解存司庫銀二十六萬餘兩所有挑浚孟瀆得勝  
澡港三河工費銀二十萬六千七百餘兩卽請於  
米價銀內按數借給分作十年攤徵還款買米搭  
運仍俟工竣將用過銀兩造冊報銷至此次挑河  
工程較大在工委員人等以及挑夫搭篷等項一  
切雜費請循照歷辦成案在於工價內扣平五分  
爲經費之用詳請具



奏前來臣等查現准戶部咨稱各項工程概行停止不得奏請興修惟武進縣孟瀆得勝澡港三河淤塞已久先經奏明係不可緩之工且所借米價將來須攤徵歸款並非動項開銷業已籌備銀款欽奉

允准與部行停工之後奏請者有間仰懇

皇上天恩俯准仍行舉辦乘此冬令興工所有估需工費等項銀二十萬六千七百餘兩經臣等細加覆核實無浮冒應請卽於

奏准緩漕米價銀內動支借給飭令該地方官督率

董事實力興辦

臣

等督飭司道等隨時查察俟工

竣後親臨驗收務使工不虛糜銀歸實用以仰副  
聖主惠徧農田永資利賴之至意所借銀兩應如府縣  
所議循照舊案歸於武進陽湖無錫金匱宜興荆  
溪六縣分別攤徵歸款容另取估計攤徵各冊結  
分別

題咨至此外尙餘米價銀五萬餘兩應照

奏定之案存俟籌辦瀏河湊借工用所有先行估挑  
武進縣孟瀆等河及借動銀款緣由謹合詞恭摺  
具

奏伏乞

皇上聖鑒訓示謹

奏

道光十年十二月二十日奉到

硃批另有旨欽此同日奉到道光十年十一月初六日  
內閣奉

上諭陶澍等奏勘估武進縣境水利工程借動籌備銀  
款一摺江蘇武進縣境孟瀆得勝凼港三河日久淤  
墊亟應興挑前經該督等奏明係刻不可緩之工業  
已籌備銀款與部行停工之後奏請者有間著照所

請所有估需工費等項銀二十萬六千七百餘兩准  
其在於奏准緩漕米價銀內動支借給該督等卽飭  
令該地方官督率董事實力興辦並飭司道等隨時  
查察務使工不虛糜銀歸實用工竣該督等親往驗  
收所借銀兩著循照舊案歸於武進等六縣分別攤  
徵歸款此外尙餘米價銀五萬餘兩存俟籌辦瀏河  
工用該部知道欽此

孟瀆等河工竣驗收摺子

奏爲武進縣境內孟瀆得勝澡港三河挑工完竣驗收如式並請將節省銀兩發典生息以備歲挑經費仰祈

聖鑒事竊照常州府屬武進縣有孟瀆得勝澡港三河北達大江南通運河係引納潮汐接濟漕運兼以灌溉民田之要道如遇水潦亦由該三河宣洩入江以免壅溢爲患前因年久湮塞以致稻田乾涸運道淺滯經臣陶澍暨前護撫臣梁章鉅先後親往勘明必應及時挑浚估需土方工價並添建閘

座圯廢沙田拆移草房遷讓墳地共銀二十萬六千七百餘兩借動糶變緩漕米價分年攤徵還款於道光十年十月內奏奉

上諭著照所請所有估需工費等項銀二十萬六千七百餘兩准其在於奏准緩漕米價銀兩動支借給該督等卽飭令該地方官督率董事實力興辦並飭司道等隨時查察務使工不虛糜銀歸實用工竣該督等親往驗收所借銀兩著循照舊案歸於武進等六縣分別攤徵歸款此外尙餘米價銀五萬餘兩存俟籌辦瀏河湊借工用該部知道欽此當卽轉飭該府

縣督率董事分段領銀實力挑辦緣值雨雪連綿  
至十一年二月先將得勝澡港兩河興挑其孟瀆  
河工長淤甚未能同時並舉經臣陶澍會同陞任  
撫臣程祖洛

奏准緩俟是年秋後接續興辦迨得勝澡港兩河挑  
至七分工次又值江潮異漲直至冬令積水未消  
不能施工而該三河被水沖刷之後情形微有不  
同應將各河口底寬深丈尺覆勘減估以歸撙節  
又經

奏准俟十二年秋後再行興辦臣林則徐自上年到

蘇後疊催司道府縣督同委員董事等將各河未挑工段應行增減之處覆勘定議與臣陶澍會核備辦於上年十月接續開工復值雨雪連綿工程倍爲費力直至今年四月間始報通工挑竣其應建閘座亦據購料興建一律完工臣陶澍現駐清江未及會驗臣林則徐當與藩司陳鑾先後親往驗收查核該三河工段內孟瀆河南段自奔牛鎮萬緣橋運河口起至小河口及北段石橋灣河口起至塔山壩隄並孟永洲至丹陽縣六沙大圩起至瓢港江口止共河長一萬三千六百十六丈三尺



估挑口寬六丈至十二丈底寬二丈至四丈五尺  
挑深六尺至一丈二尺五寸不等又得勝河自運  
河連江橋進口起至江口止河長七千四百四十  
四丈五尺五寸估挑口寬四丈至十丈底寬一丈  
六尺至四丈挑深三尺四寸至七尺五寸不等又  
澡港河自燕子河工首起至江口止河長五千四  
百四十八丈四尺估挑口寬三丈五尺至十丈底  
寬一丈四尺至六丈挑深一尺至六尺不等按照  
估冊逐段量明丈尺均已如式並據稟報孟河段  
內挑出江船一隻船身量長三丈有餘驗明係久

三才圖會卷三  
三  
涇河底歷屆挑河未經挖出之陳物該處土人交  
相歎異其開工自頂至底逐一驗量亦俱堅固並  
無草率偷減惟附近岸灘間有堆貯河泥業經飭  
令剷撈淨盡翻貯遠處以免坍卸入河隨令開壩  
放水測探三河水勢自五六尺至八九尺均係一  
律深通溯查該三河距前屆興挑之時遠者垂七  
十年近者亦二十載均因淤沙漸積涇塞不通運  
道農田交受其累仰蒙

聖恩准其借款疏濬民辦官稽毫不假手吏胥一清挑  
河積弊統計孟瀆得勝澡港三河開挑工段共長

二萬六千四百餘丈灌溉武進縣田二十九萬四千六百餘畝其陽湖無錫金匱宜興荆溪各縣亦各分沾其利從此運道無虞淺阻而農田亦免旱澇之傷藉以仰副

皇上惠溥羣黎永資利賴之至意惟該河岸土鬆浮每易坍卸加之往來潮汐不免沙積淤停仍須間年擇段疏挑俾河身永臻通暢此項工費民力不能屢捐亟應預爲籌備查三河原估銀二十萬六千七百餘兩現在通工用過土方夫工料物等項共銀一十八萬九千六百六十七兩八錢七分六釐

又添車戽雨水實用水方夫工銀六千九百三十  
四兩五錢六分四釐較原估計節省銀一萬一百  
三十二兩二錢一分二釐應請仍照原估銀數攤  
徵歸款卽以此項節省之銀歸於武進陽湖二縣  
發典按月一分生息將息銀解存司庫作爲該河  
歲修經費俾得間年擇段疏濬永不停淤似於

國計民生兩有裨益至孟濱河超瓢港新口及護城  
河各處圯廢民田雖已給發價值但已成廢地自  
應飭令查明字號畝數將額完課銀詳請咨部豁  
除庶民間免受虛糧之累除催取估計攤徵各冊

結及應豁空廢田畝錢糧數目分別

題咨外所有驗收挑工緣由謹合詞恭摺具

奏伏乞

皇上聖鑒謹

奏

道光十三年七月十六日奉到

硃批另有旨欽此同日奉到道光十三年六月二十六

日內閣奉

上諭陶澍等奏驗收武進縣境內三河挑工並籌備歲  
挑經費一摺江蘇常州府屬武進縣孟瀆德勝澡港

三河據該督等奏稱通工挑竣驗收如式惟該河身  
尙須間年擇段疏挑俾資通暢此項工費民力不能  
屢捐自應豫爲籌備所有原估銀二十萬六千七百  
餘兩除現在通工用過工費等項銀兩外計節省銀  
一萬一百二十二兩零著照所請准其仍照原估銀  
數攤徵歸款卽以此項節省之銀歸於武進陽湖二  
縣發典生息將息銀解存司庫作爲該河歲修經費  
俾運道農田永資利賴其孟瀆河超瓢港新口及護  
城河各處圯廢民田著查明字號畝數將額完課銀  
咨部豁除以省虛糧之累該部知道欽此

挑濬孟瀆等河工竣摺子

奏爲查明挑濬孟瀆等河工程繁鉅謹將尤爲出力之官紳董事分別奏懇

天恩量加獎勵仰祈

聖鑒事竊照武進縣境內孟瀆得勝溇港三河挑工並

建設閘座一律完竣經

臣

林則徐與藩司陳鑾先

後親往驗收並無草率偷減除另摺

奏報外伏查該三河挑工先經

臣

陶澍會同前護撫

臣

梁章鉅

奏明選舉董事余保純等分段領銀挑辦官爲稽察

通計三河工段共有二萬六千餘丈之多挑深六七尺至丈餘不等港汊叢雜道路綿長自道光十一年二月開工以來疊爲雨水所阻上年十月續行興辦偏值冬春兩季雨雪連綿復厯半載有餘始得一律全完驗明如式其間官員紳董辛苦賠累之處實有數倍於他工者緣該處土性多係淤淤與徒陽運河之豬婆灘等工情形相似河心甫浚泛沙復涌而上浮邊土削齊坍岸旋傾而下積鑿冰則晝開夕合滲水則暮昇朝盈是以一段之工有復挑三四五次始能勻淨者且當雨雪連綿



之際惟冀待霽施工通工人夫不敢任其散去逐日計口授食爲時愈久則所費愈多在董事不能無賂貼之夫工而官員尤不能無捐貲之犒賞然各急公踴躍効命忘勞俾利溥於百年而功成於衆志查自道光十年至今在事各員內除前任藩司梁章鉅桂良署任藩司額騰伊現任藩司陳鑾皆經籌議周詳督催盡力但係藩司大員均不敢仰邀議敘外其府縣以下及承辦之紳衿董事於節次勞累之中俱能實力實心工成效著似應酌加獎勵以勸勞績而順輿情茲據蘇州藩司陳鑾

查明出力官紳董事開摺詳請具

奏前來臣等查道光八年挑辦吳淞江案內仰蒙

恩准陞用者十一員儘先選補者五員從優議敘者十  
三員此次孟瀆得勝澡港三河工次人數衆多惟  
當力加刪減未敢多登薦牘謹擇其最爲出力者  
開具清單恭呈

御覽可否仰懇

天恩量加鼓勵之處出自

聖主鴻施此外出力稍次人員由臣等在外分別記功  
給獎理合恭摺具

奏伏乞

皇上聖鑒訓示謹

奏

道光十三年七月十六日奉到

硃批另有旨欽此同日奉到道光十三年六月二十六

日內閣奉

上諭陶澍等奏挑浚孟瀆等河工竣請將出力之官紳  
董事分別獎勵一摺江蘇武進縣境內孟瀆德勝澡  
港三河挑工並建設閘座一律完竣所有出力之官  
紳董事等應量予恩施常州府知府汪河署武進縣

事金壇縣知縣姚瑩俱著加恩交部從優議敘署常州府總捕通判試用同知高煥著將降一級處分開復歸本班儘先補用常州府照磨羅在爵宜興縣丞汪仁金匱縣望亭巡檢張訓遙宜興縣下邳巡檢管兆蕃俱著以應陞之缺儘先陞用試用主簿吳城沈之彥俱著以本班儘先補用前任廣東南雄直隸州知州余保純著賞加知府銜舉人言啟方著以教職用候選州吏目趙焜未入流朱鑑泉俱著捐足分發簽掣省分試用期滿儘先補用議敘從九品職銜巢遇良著加給六品職銜以示鼓勵該部知道欽此

請將糴米價銀留爲湊挑瀏河之用附片

再江南省蘇州藩司所屬之四府一州均係水鄉  
且爲財賦最重之區年額應徵地丁漕項正耗共  
銀二百餘萬兩漕白起運米一百五六十萬石賦  
出於田田資於水故水利最關緊要查蘇松水利  
以吳淞黃浦瀏河爲大謂之三江道光四年間臣  
林則徐在江蘇臬司任內欽奉

諭旨總辦三江水利因值丁憂回籍未及辦理其時將  
黃浦一路工程先行擇要委員挑辦嗣吳淞江淤  
塞僅存一綫涓流道光八年間臣陶澍在巡撫任

內

奏准興挑竣事迨十一年間大水爲災蘇松二屬幸  
有挑深之黃浦吳淞爲之宜洩其瀏河白茆孟瀆  
等河臣陶澍於吳淞收工摺內附片聲明分年籌  
辦嗣請借糶七年徵剩及八年帶徵緩漕爲挑浚  
瀏河之用經部駁令籌借別款因工鉅費繁別無  
閒款可籌覆議暫緩道光十年又經奏請將各屬  
緩漕搭運剩米十數萬石糶變暫借動以爲瀏河  
孟瀆挑工經費攤徵歸款仰蒙

俞允旋復籌議先挑孟瀆得勝藻港三河所需工費卽

於緩漕米價銀內動支借給並聲明尙餘米價銀  
五萬餘兩應照奏定之案存俟籌辦瀏河湊借工  
用欽奉

諭旨准行在案臣等伏查瀏河爲三江之一縣長七八  
十里上自太湖東北迤邐而來至新陽縣界與吳  
淞江分流而東遶太倉州城南慙鎮洋嘉定等界  
東入於海爲農田灌溉宜洩要道自道光三年水  
災之後沙泥停積蓄洩難資近來淤墊更高幾成  
平陸以致太倉闔屬棉花稻穀頻歲歉收徵辦錢  
漕極形棘手且下游壅塞卽爲上游蘇松一帶水

道之梗若不亟加疏浚一遇旱澇之年非淹卽涸  
不特民生受困抑且蠲緩賑卹入少出多於

國計尤有關繫是瀏河必應挑辦實爲目前萬不可  
緩之工所有糶變米價餘剩銀五萬餘兩自應欽  
遵原奉

諭旨留爲湊挑瀏河之用惟工長費鉅或應就款擇要  
先挑或應另籌款項湊辦尙須確勘妥議臣等現  
飭藩司委員悉心查勘通盤熟籌商辦俟覆到再  
行奏

聞理合附片陳明謹



奏

道光十二年七月十六日奉到

硃批覽欽此

請樽節估挑瀏河白茆河以工代賑摺子

奏爲瀏河白茆河年久愈形淤塞議請樽節估挑以  
工代賑分別借

帑捐辦恭摺奏祈

聖鑒事竊照蘇松太倉等屬爲錢漕最多之區水利農  
田攸關重大該境有吳淞黃浦瀏河卽古所謂三  
江其北又有白茆河自爲一大支與三江相爲表  
裏前此道光四年間奉

旨飭辦三江水利因高堰方興大工集夫不易僅將黃  
浦一路先爲挑濬道光六年復奉

諭旨飭挑吳淞江其餘瀏河白茆各工並經

奏明分年辦理惟因工費較鉅查道光四年奉

旨飭辦案內曾估需銀四十餘萬兩頻年籌措維艱祇  
有糶變米價餘賸銀五萬餘兩奏奉

恩准留作瀏河工用仍須另籌款項方可湊辦年來河

道愈形淤塞農田連遭積歉更宜亟修地利以期

補助天時而地方紳民先後懇請興挑呈詞盈帙

察看輿情甚爲急切節經臣等飭司委員核實勘

估摺節籌辦去後茲據蘇州藩司陳鑾署臬司李

彥章蘇松太道吳其泰會詳稱瀏河爲古婁江源

出太湖東北至新陽縣界與吳淞江分流而東繞  
太倉城厯鎮洋嘉定二縣境綿長七八十里白茆  
河坐落常熟昭文二縣境內上承長洲元和無錫  
金匱江陰諸水綿長五六十里均因淤塞多年幾  
成平陸旱澇俱無從灌溉田疇卽漸就荒蕪錢漕  
亦愈難徵比該兩河急需開濬實爲目前必不可  
緩之工但尾閘皆有壩身外高於內若必開通海  
口恐潮汐倒漾轉易停淤且口門皆有攔沙挑濬  
倍爲費力卽開通之後漲沙恐復相連今爲農田  
起見期於利灌溉而便疏消則莫若挑作清水長

河不必求通海船既節目前之工費且免日後之  
受淤其爲利益農田似有把握先經該藩司檄委  
署蘇州府知府陳經太倉州知州李正鼎青浦縣  
知縣蔡維新公同履勘估計續又添委蘇州府知  
府沈兆澐元和縣知縣平翰前上元縣知縣黃冕  
會同署太倉州知州周岱齡鎮洋縣知縣曾承顯  
署常熟縣知縣藍蔚雯昭文縣知縣張綬組逐段  
丈量分別造冊呈送並以上年秋禾被歉現值青  
黃不接之時小民力食維艱正宜以工代賑稟請  
卽時興辦復經該藩司親往覆勘瀏河自吳家墳

港口起至白家廠又鹽鐵老壩基起至吳家墳港  
又老虎灣至紅橋灣及陶家嘴錢家嘴等處通共  
約計工長一萬五百一十六丈估挑面寬十丈餘  
尺至八丈餘尺不等底寬三丈平水面濬深九尺  
又南北兩岸切灘並挑土山土埂以及修築通工  
壩閘挖廢民田給價等項共約估銀一十六萬五  
千三百二十餘兩白茆河自支塘東勝橋起至海  
口止工長七千八百四十丈估挑面寬六丈底寬  
四丈深一丈所需挑濬土方並建新閘及滾水壩  
一座共約估銀一十一萬兩零惟兩處工程並計

需款較多自應分別籌辦請將瀏河借項興挑分  
年攤徵歸款白茆河歸於官民捐辦等情詳請具  
奏前來臣等伏查瀏河白茆河兩處均係早經勘估  
奏明必應辦理之工惟從前估計係欲挑通入海而  
議者謂其海口高於內地潮來旋卽淤塞又謂口  
門現有攔沙卽極力挖通不久恐仍堵合且鑿沙  
通海需費太繁款項難籌是以未能興辦近因旱  
澇無備田畝頻至歉收若再因循此後愈難爲力  
且民間望沾水利與目前望賑同一急切之情尤  
須乘此興工乃爲一舉兩得竊思挑通海口工費

既大而能否經久轉不可知不若挑作清水河工  
省利長於農田實有裨益緣三江之中黃浦吳淞  
兩處海口水勢皆已暢出惟因瀏河白茆兩處淤  
塞東北一帶之水溢於平疇今將此兩處河道開  
通共長一百數十里可資容納正不必自闢海口  
而與吳淞黃浦交匯通流適足以助其建瓴之勢  
查瀏河老鎮本有閘座可以隨時啟閉今擬於閘  
外白家廠之地再建滾水石壩一道以堵渾潮白  
茆河亦於海口縮入數段建閘築壩使潮汐泥沙  
平時不能壅入如遇內河水大仍可由壩上瀉出



歸海則湖水有清無渾卽永遠有利無害其瀏河  
估需土方壩工等銀十六萬五千三百餘兩係屬  
節省無浮除遵照

奏准之案動撥緩漕米價五萬三千餘兩外其餘銀  
兩查有司庫現存水利經費專款銀五萬兩本係  
從前議濬三江案內

奏明爲蘇省水利之用應請儘數動撥尙不敷銀六  
萬二千三百二十餘兩請於封貯款內借支所借  
之銀在於同沾水利之蘇松太三屬長洲元和吳  
縣吳江震澤崑山新陽華亭婁縣上海青浦太倉

鎮洋嘉定寶山崇明十六州縣按照銀數均派分  
作八年按畝攤徵將來解還司庫除先歸米價外  
餘皆收作水利經費專款以備蘇省將來續修各  
處水利之需仍照舊案俟收有捐監銀兩首先歸  
補封貯原額其應挑工段亦請循舊歸於太倉鎮  
洋嘉定寶山崑山新陽六州縣計畝雇夫分段承  
挑至白茆河估銀一十一萬兩零亦屬節省辦理  
惟經費有常未敢概請借

帑臣等現在率同司道府縣倡捐廉銀並諄勸常昭  
兩縣紳商富戶以此河既係萬不可緩之工而民

情又處迫不可支之景各宜勉力捐貲以工代賑  
該紳民等聞而感奮均各踴躍急公現已議定章  
程自可捐收如數臣等仍督同司道遴委廉明勤  
幹之員協同地方官選董集夫隨捐隨辦並責令  
該管道府州於兩河工程各須認真查察一俟工  
竣由臣林則徐親往驗收不許稍有草率偷減並  
不令假手胥役地保稍滋弊竇以期工歸實在利  
濟農田仰副

聖主爲民興利之至意除將瀏河挑工取造估計報銷  
各冊繪圖另行

題咨外其白茆河係捐辦之工應請無庸報銷謹合

詞恭摺具

奏伏乞

皇上聖鑒訓示謹

奏

道光十四年三月十七日奉到

硃批另有旨欽此同日奉到道光十四年三月初七日

內閣奉

上諭陶澍等奏請估挑瀏河白茆河以工代賑分別借帑捐辦一摺蘇松太倉等屬之瀏河白茆河兩處均

係早經勘估奏明必應辦理之工近年愈形淤塞據該督等查明實在情形奏請勘估興挑撙節辦理並以工代賑分別借帑捐辦著照所請所有瀏河估需土方壩工等銀十六萬五千三百餘兩除動撥緩漕米價五萬三千餘兩外其餘銀兩著准其於司庫現存水利經費專款銀五萬兩儘數動撥尙不敷銀六萬二千三百二十餘兩卽著於封貯款內借支所借之銀在於蘇松太三屬之長洲元和吳縣吳江震澤崑山新陽華亭婁縣上海青浦太倉鎮洋嘉定寶山崇明十六州縣按照銀數均派分作八年按畝攤徵

解還司庫除先歸米價外餘皆收作水利經費專款  
以備將來續修各處水利之需仍照案俟收有捐監  
銀兩首先歸補封貯原額其應挑工段卽著歸於太  
倉鎮洋嘉定寶山崑山新陽六州縣計祇雇夫分股  
承挑其白茆河估銀一十一萬兩零係屬官民捐辦  
該督等卽督率司道遴委廉明勤幹之員協同地方  
官選董集夫隨捐隨辦並責令該管道府州於兩河  
工程均須認真查察工竣後該撫親往驗收不准稍  
有草率偷減並不得假手胥役地保稍滋弊竇以期  
利濟農田工歸實用其白茆河工程係屬捐辦之工

著免其造冊報銷該部知道欽此

查勘瀏河白茆挑工履視海塘及丹陽練湖形勢

附片

再三吳水利前自籌濬吳淞接挑孟瀆澡港得勝  
三河及太湖之鵬鶚河丹陽之湖河間座均經次  
第辦理其餘支河小港隨時籌辦尙多惟瀏河白  
茆淤塞多年籌款未竣此次瀏河蒙

恩借帑興修並設法捐挑白茆開工之後適值天氣晴

和以工代賑人情樂事趨公

臣與撫臣

分路查勘

各工均極通利尙有壩座涵洞及支浦挑切不日  
即可全葺閭閻懽忭香花載道咸以數年來各省



水患較多惟蘇松一帶幸免沈災皆由吳淞江開  
挖深通之故感戴

皇恩淪肌浹髓

臣

與撫

臣

面商吳淞一江全吳樞鑰必

須來源旺盛不分其流方能冲刷沙泥積久不塞  
擬於上游吳淞各澗再加疏濬以資遠利

臣

沿海

履視海塘至寶山縣境各士民呈請一例加修石  
工以資捍衛復遣上海道吳其泰往視華亭濱海  
塘工亦均有應須修補之處又丹陽士民因練湖  
淤淺蓄水無多呈請驗修

臣

復順道履勘其受病  
之處總在上游山水衝湧易決易洩須得添建滾

壩加築圩堰俾水勢歸湖而免沖潰侵淹之患現  
批鎮江府汪忠增督勸民捐民辦如果能成不但  
裨益農田卽徒陽運河亦緩急有需矣臣巡歷各  
境蘇松常太等屬勸捐賑濟發給貧民錢米俱已  
三五次不等辦理安詳人情敕謐鎮江捐賑尤多  
其江寧省城粥廠自上冬捐設以來統計四廠共  
賑過大小男婦三百七十萬二千餘口撤廠後仍  
收養老幼殘疾四千餘人俟麥收時資遣現俱一  
例放散極其安靜臣查閱蘇常各營畢卽尾催漕  
艘渡江北上截至本日僅剩浙船十四幫數日內

陶文毅公全集

卷二十八

奏疏

聖

即可渡江全竣沿途割麥插禾時雨滋潤民氣熙

恬堪以仰慰

宸廑理合附片縷陳謹

奏

道光十四年六月初三日奉到

硃批知道了欽此

陳奏開濬瀏河並建設石壩涵洞全竣摺子  
奏爲開濬瀏河並建設石壩涵洞各工全行告竣驗  
收如式請將格外節省餘銀疏挑上游各源流淤  
淺處所以資久遠並擇在工尤爲出力之官紳董  
事分別懇

恩獎勵恭摺奏祈

聖鑒事竊照太倉鎮洋境內之瀏河爲古三江之一前  
因淤塞多年幾成平陸旱澇無備田畝頻至歉收  
爲目前必不可緩之工當經臣等會摺

奏蒙

恩旨俯准借項興挑分年攤徵還款凡在蘇松太三屬得沾水利之處無不頂戴

皇仁踴躍趨事臣等轉飭司道府縣督率委員董事分段承挑勒限完竣並以工段綿長如其中有可格外節省之處亦宜隨時斟酌據實稟辦嗣據署太倉州知州周岱齡署鎮洋縣知縣曾承顯委員前上元縣知縣現署元利縣知縣黃冕等會稟原估各工土方丈尺均係核實無浮惟河勢彎環之處若相機取直尙可加意撙節查老虎灣至紅橋灣舊河向南圍繞今由吳家墳港取直挑至小瀏河

口匯歸原河計可省工一千八百餘丈又陶家嘴  
錢家嘴舊有河形亦俱向南繞越若再取直開挑  
可省工五百餘丈又原議於閘外白家廠建滾水  
石壩一道以禦渾潮茲查石壩固足禦潮但恐內  
河水大宣洩欠靈因於該壩添設涵洞五所俾潮  
大時將洞閉塞不使渾水漫入設遇內河水大卽  
可全行開放宣洩入海操縱較有把握等情復經  
批飭妥辦卽據藩司先後報放銀兩於本年三月  
初八等日陸續開工幸天氣暄晴人夫雲集卽委  
各員及董事人等皆能督率嚴催所有應挑土方

於四月底卽經挑竣臣陶澍出赴蘇松閱伍之便  
會同臣林則徐暨藩司陳鑾到工驗收沿途香花  
載道欽感

皇恩歡忭異常驗量所挑丈尺有贏無絀惟河身旣已  
濬深則隄岸愈高轉有崩卸之處復令逐段挑切  
以歸一律又海口砌築石壩添設涵洞凡石料椿  
木錠銅灰漿購運鳩工有需時日復飭趕緊辦理  
旋據太鎮三州縣暨委員具報通工全行告竣又  
經臣林則徐臨工覆驗河身倍見深通隄岸一律  
平整閘壩俱臻堅固涵洞最便蓄宣均無草率偷

減情弊查瀏河自吳家墳港口起至白家廠又鹽  
鐵老壩基起至吳家墳港又老虎灣至紅橋灣及  
陶家嘴錢家嘴等處原估工長一萬五百十六丈  
面寬十丈餘尺至八丈餘尺不等底寬三丈平水  
面溶深九尺又南北兩岸切灘並挑土山土埂以  
及估築通工壩閘空廢民田給價等項共估銀一  
十六萬五千三百二十餘兩今將吳家墳陶家嘴  
錢家嘴等處取直開挑又省工二千四百餘丈少  
挑土十五萬六千餘方計通工土方連修築閘壩  
空廢民田給價等項共銀十三萬四百二十二兩



零較之原估格外節省銀三萬四千九百兩零據  
蘇州藩司陳鑾請將前項節省餘銀留辦上游淤  
淺處所並查明在事尤爲出力官員紳董酌議分  
別獎勵詳請具

奏前來臣等伏查瀏河工程係屢經

奏明必應辦理之工祇因工鉅費繁有需籌措茲以  
濬清堵濁之法樽節估計挑仰蒙

聖恩借帑興辦而相機取直則於節省之中又有節省  
此次工竣之後適七月二十三四五等日蘇松一  
帶大雨傾盆太湖附近諸山陡發蛟水處處盛漲

拍岸盈隄當卽飛飭太倉鎮洋二州縣將該壩涵洞全行啟放據稟滔滔東注兩日之內消水二尺有餘而秋汛大潮仍無倒灌是瀏河之容納與涵洞之宣洩實已著有成效惟思三江之水無不承太湖而來而自太湖遞至三江其中泖澱等處均係經由要道淤塞多年前因三江尙未全疏無暇兼顧臣陶澍於順看瀏河工程片內卽經聲明尙須再濬上游各澱茲瀏河工程得以格外節省卽上游水道亟須擇要接挑又太倉州有七浦河一道在州境東北直達海口形勢較瀏河爲小實則

與爲表裏亦因年久淤塞愈懇一律疏通此等水利工程在江蘇原不勝枚舉然其最爲扼要之處所繫於利害者匪輕若不乘時興修脈絡仍多阻滯竊思前項節省餘銀本係原估應行動用之款今因逢灣取直極力省出卽留作挑濬支河之用實屬以公濟公合無仰懇

聖恩俯准將節省餘銀於各處淤淺河道擇要興辦所有瀏河借款仍照原估十六萬五千三百二十餘兩之數歸於太鎮等十六州縣分年攤徵還款自足以資遠利而愜輿情至此大挑辦瀏河在工印

委各員及紳董人等均係自備資斧奮勉趨公不  
辭勞瘁似應量予獎勵惟人數衆多臣等未敢悉  
登薦順謹擇其尤爲出力者開具清單恭呈

御覽如蒙

聖主鴻慈俯加鼓勵該官紳等倍加感激踴躍急公臣

等亦得收指臂之效其出力稍次人員在外分別  
記功給獎除同時捐挑之白茆河道現亦將次全  
完容俟驗收另行具

奏並飭將瀏河工長高寬丈尺土方夫工銀兩各項  
價值細數另開清單一面將太湖以下泖澱支河

暨太倉州境內七浦河道委員確勘估計銀數分別詳請

奏報外所有臣等驗收瀏河工程緣由謹合詞恭摺具

奏伏乞

皇上聖鑒訓示謹

奏

道光十四年九月十五日奉到

硃批另有旨欽此同日奉到道光十四年九月初五日

內閣奉

上諭陶澍等奏開濬瀏河全工告竣將尤爲出力之官紳董事人等開單呈覽請分別獎勵一摺江蘇省太倉鎮洋境內之瀏河淤塞多年前前經奏明借項興挑分年攤徵還款茲據該督等奏稱遴委官紳董事人等分段承挑勒限完竣原估銀一十六萬五千三百二十餘兩現計通工土方修築閘壩挖廢民田給價等項共用銀十三萬四百二十二兩零較原估格外節省銀三萬四千九百兩零在工印委各員及紳士董事人等均係自備資斧奮勉趨公不辭勞瘁自應量予恩施加恩著照所請署太倉州知州常州府通

判周岱齡著賞加同知銜署元和縣知縣黃冕著以  
同知直隸州知州卽補先換頂戴署鎮洋縣試用知  
縣曾承顯著不論繁簡遇缺卽補蘇州府丁憂知府  
沈兆淦著賞加道銜署松江府事太倉州知州李正  
鼎著賞加知府銜太倉州州同于翼如青浦縣知縣  
蔡維新試用布政司理問曾玉衡俱著賞加知州銜  
鎮洋縣甘草司巡檢曾浩委用縣丞王直瀾俱著以  
應陞之缺陞用王直瀾著俟補缺後卽陞署寶山縣  
事崑山縣知縣張連茹著俟服闋後歸部儘先選用  
試用知縣龔潤森從九品程德滋未入流吳耀曾俱

著以本班儘先補用太倉州舉人揀選知縣錢寶瑛  
著賞加六品頂戴崑山縣候選兵馬司副指揮李增  
厚著以副指揮歸部儘先選用以示獎勵所有前項  
工程借撥款項著仍照原估十六萬五千三百二十  
餘兩之數歸於太倉鎮洋等十六州縣分年攤徵還  
款其節省餘銀該督等卽督飭所屬將上游各處淤  
淺河道擇要興挑太倉州七浦河一道亦著一律疏  
通以利蓄洩而備旱潦該部知道單併發欽此